

Zvonko Marić  
Zastupnik SBB BiH

BOSNA I HERCEGOVINA  
FEDERACIJA BOSNE I HERCEGOVINE  
KANTON SARAJEVO  
SKUPŠTINA KANTONA SARAJEVO  
n/r Skupština Kantona Sarajevo  
n/r Vlada Kantona Sarajevo  
Sarajevo, 14.05.2019.

Na osnovu **člana 213. Poslovnika Skupštine Kantona Sarajevo** podnosim inicijativu da Skupština Kantona Sarajevo u skladu sa **članom 2. ZAKONA O UTVRĐIVANJU I OBILJEŽAVANJU DANA KANTONA SARAJEVO (Službene novine KS 33/05)** svojom odlukom utvrdi (datum) kao Dan ubijene djece Sarajeva.

### OBRAZLOŽENJE

Pokrećem inicijativu da se u "Program obilježavanja značajnih datuma", a u okviru Dana Kantona Sarajevo jasno definiše datum za obilježavanje i sjećanje na 1601 ubijeno dijete u glavnom gradu BiH. Smatram da smo dužni prema nevinoj djeci koja su ubijena u našem gradu da to bude poseban dan, u kojem će biti održan veliki sat (čas) i koji će biti obilježen prigodnim manifestacijama. Držim da ne bi bilo dobro da to bude 2,3 i 9. maj, svi drugi dani dolaze u obzir. Uvrštavanje dana "Obilježavanja ubijene djece Sarajeva" je i naša moralna obaveza i pijetet prema njihovoj nevinoj žrtvi, ali istovremeno i samopoštovanje, jer ne postoji ni jedan razlog zbog kojeg ne bi obilježavali ovaj dan.

Sjetimo se samo streljanja Kragujevačkih učenika, njih 40 do 15 godina, 272 srednjoškolca i 15 čistača obuče, koje su njemačke okupacione snage usmratile 1941. godine. Ovaj datum se i danas obilježava u Srbiji, pa je čak i velika pjesnikinja Desanka Maksimović posvetila čuvenu "krvavu bajku" a uz to ovaj datum je planetarno poznat i s dužnim poštovanjem se odnose svi koji znaju za njega.

Bez namjere da licitiram brojem ubijene djece, ali moram istaći da je u Sarajevu ubijeno 1601 dijete, što otprilike znači da su u Sarajevu dvije škole učenika stradale u agresiji na Bosnu i Hercegovinu. Mislim da je suviše iznositi dodatnu argumentaciju za ovu inicijativu, i zato molim da zastupnici u Skupštini KS podrškom ovoj inicijativi, pored ostalog izraze i samopoštovanje, jer ako ne poštujemo sebe teško je očekivati da će nas neko drugi poštovati.

Predlažem da se prigodna centralna manifestacija održava kod Spomenika ubijenoj djeci Sarajeva u Velikom parku, a ostale u organizaciji općina na prigodnim mjestima koje odrede za to općinske vlasti. Sve to podrazumijeva sudjelovanje svih škola na području KS.

Jasno je da će pomoć za organiziranje obilježavanja ovoga dana, biti potrebna finansijska podrška Vlade KS - i u tom smislu ukoliko Skupština KS podrži ovu inicijativu, očekujem da će i Vlada KS zauzeti pozitivan stav o ovom pitanju - i da neće izostati finansijska podrška i lokalnih zajednica. Vjerujem da će u finansiraju ovog događaja na adekvatan način, učestvovati i uprava Grada Sarajeva i mnogi drugi zainteresirani privatni i javni subjekti.

Nadam se da će ovo biti još jedan od načina borbe protiv nekulture zaborava.

Molim Skupštinu Kantona Sarajevo da se **izjasni o mojoj inicijativi**

Zastupnik SBB u SKS  
Zvonko Marić